

**INKULUMO KANGQONGQOSHE WEZOKUTHUTHA, UKUPHEPHA
NOKUXHUMANISA UMPHAKATHI KWAZULU-NATAL UMNUZ WILLIES
MCHUNU NGENKATHI EHAMBELE IBANDLA LAMAZAYONI EMNAMBITHI
MHLAKA 12 NOVEMBER 2011.**

Mphathi wohlelo;

AbaBhishobhi abakhona;

AbeFundisi;

Ubuholi bonke ngokwehlukana kwezigaba eBandleni lamaZayoni;

Abazalwane bonke;

Nginyanibingelela egameni leNkosi yethu uJesu Kristu.

Egameni loMnyango wezokuThutha, ukuPhepha nokuXhumana koMphakathi noHulumeni wonke waKwaZulu-Natal, ngithanda ukuthatha leli thuba ngibonge iBandla lamaZayoni lonke kodwa ngibhekise ikakhulukazi kosokhaya okuyiNyonini ngokusimema ukuba sibe yingxenye yale nkonzo yokulekelela umphakathi wakithi ukuba uphephe ngalesi sikhathi sikaKhisimusi.

NjengoHulumeni, sihlale sikhuthazeka uma sibona ukubambisana kwalolu hlobo nomphakathi ongamakholwa kulesi fundazwe. Ukwamukeleka esikuthola njalo uma sihambela izinkonzo ezinjengalena kuyasijabulisa kakhulu.

NjengoMphathiswa woMnyango wezokuThutha KwaZulu-Natal, mangiqale ngokucacisa nje ukuthi umsebenzi osemqoka walo Mnyango ngukuqinisekisa ukuthi abantu bafinyelele kalula lapho beya khona.

Okusho ukuthi kumele kube nemigwaqo namabhuloho. Kodwa okubaluleke kakhulu emsebenzini wethu ngukuthi abantu baphephe phela uma sebesebenzisa le ngqalasizinda esibalethela yona.

Ngenxa yalokhu-ke, kusukela eminyakeni edlule uMnyango ulokhu uqhamuka nemikhankaso eminingi yokuqinisekisa ukuphepha emgwaqeni. Omunye wayo yilona okhula njalo wokusebenzisana nabamaBandla ezenkolo.

Kuhlale kuyinkolelo yalo Mnyango ukuthi amaBandla yiwona okumele abambe iqhaza elibalulekile ekulweni nokufa kwabantu ezingozini zomgwaqo. Ukukhulekela ukuphepha emgwaqeni kumele kuhambisane nokuthi nathi njengabazalwane sizibophezele ekubhekeleni ukuphepha kwethu nezihlobo zethu.

Siyawazi umthelela owenziwa izingozi zomgwaqo emakhaya ethu. Silahlekelwa izingane zethu eziyikusasa lesizwe, silahlekelwe ngabantu abondla imindeni nabaneqhaza ekwakhiweni komnotho wezwe lethu.

Lezi zingozi zidla imali eshisiwe njengoba uHulumeni kuzwelonke uchitha imali ebalelwa ku-R60 billion, ngokubhekela izindleko zokwelashwa kwalabo abasuke belimele ezibhedlela, ukubanxephezela kanye nabasuke sebezoba yizinkubela bangene ngaphansi kohlelo lokubonelelwa nguHulumeni, nakho okudla enkulu imali.

Kuke kwaba nesikhathi lapho khona isonto nesonto bekufa abantu abangaphezulu kweshumi ingozi ngayinye phakathi kwenyanga ka-July noSeptember. Kuze kwaba ngcono ngo-October lapho sibone khona ukwehla kwezingozi nokufa kwabantu ngale ndlela.

Sibe sesithi-ke le ndlela abantu abaziphathe kahle ngayo ngenyanga ephelile, ikhombisa ukuthi lo mkhankaso wethu wokuqeda izingozi ungaphumelela uma wonke umuntu ezimisele ngokubamba iqhaza.

Ngaleyo ndlela-ke sikubone lokhu kuyisisekelo okumele sakhele phezu kwaso njengoba siqala amaholide kaKhisimusi kuze kube nangemuva kwawo.

Njengamanje-ke isifundazwe saKwaZulu-Natal sesethule umkhankaso wokulwa nezingozi zomgwaqo kanye nobugebengu jikelele esiwubiza ngokuthi u-Operation Val'ingozi. Lo mkhankaso siwethule ngokomthetho eThekwini ngoLwesihlanu olwedlule ngokubambisana nenyunyana i-Police and Prisons Civil Rights Union (POPCRU).

I-POPCRU inamalungu angaphansi kuka-RTI ahlale ebona lezi zibhicongo ezihlale zenzeka emgwaqeni. Nakuwona futhi amaphoyisa, amalungu abo lawa abhekana nezigegebengu nokufa mihla namalanga.

Iningi lethu-ke lapha liyazi ukuthi vele ingozi ithathwa njengento enomkhokha edinga ukuvalwa. Ngakho-ke lithe uma liqhamuka leli gama ngabona ukuthi lingena kahle impela njengoba lithinta nosikompilo lweningi lethu, ikakhulukazi esingabantu amamnyama.

Ngibe sengithatha isinqumo sokuthi makube yinto esiyitshala nakuzo zonke izinhlaka esisebenzisana nazo kuhlenganisa nani enisemaBandleni ezenkolo. Leli Bandla lalapha yilona-ke eselibe ngelokuqala ukuba silihambele sizokwethula kulona u-Operation Val'ingozi.

U-Operation Val'ingozi uyimizamo yokubuyisa onembeza kuthina sonke. Umyalezo wethu ucace kahle: **'Khuluma nonembeza wakho, ungawephuli umthetho, ungabulali abantu'**.

Ngokwesipiliyoni esesinaso kuyavela ukuthi abashayeli yibona abayimbangela yezingozi eziningi. Ngakho-ke ukusebenza kwethu kubhekene ngqo nabashayeli, ikakhulukazi onembeza babo.

Sibuza ukuthi uthini unembeza wakho uma ukhuluma ne-cell phone ushayela?

Uthini unembeza wakho uma usika lapho kungafanele khona?

Uthini unembeza wakho uma uhamba ngejubale eleqile?

Sithi khuluma nonembeza wakho, uyekele ukubulala abantu.

Injongo yethu lapha ngukunqanda ukulahleka kwezimpilo zabagibeli nabashayeli nokuqinisekisa ukuthi sinezithuthi zomphakathi ezisebenza ngokusemthethweni emigwaqeni yethu.

Ngalo-Operation Val'ingozi sethula uhlelo olusha oludidiyele noluzoluma impela ukuze kunqandeke ukufa kwabantu emigwaqeni yethu sibe futhi siqinisa nasekulweni nobugebengu.

Lo mkhankaso uzolekelelana nohlelo esivele sesiluqalile lwezokuphepha emgwaqeni ngesikhathi samaholide kaKhisimusi, bese usiza nasekunqandeni izigameko zobugebengu ezivame ukuhambisana nalesi sikhathi senjabulo.

Sizogxila ekuqiniseni umthetho, sakhe ukubambisana nezinye izinhloko, sikhuthaze ukuziphatha ngendlela nokuhlonipha umthetho lapho sizobe sifundisa khona ngokuphepha emgwaqeni. Kuzobhekwa kakhulu lawo macala athathwa njenganomthelela kakhulu ekufeni kwabantu emigwaqeni yaKwaZulu-Natal.

Konke lokhu sizokwenza ngokuqinisa izimvimbamgwaqo kubhekwe kakhulu amalaysensi okusebenza kwabathutha umphakathi, isimo semoto, isimo somshayeli nendlela umuntu aziphatha ngayo ngenkathi eshayela.

Siyazibophezela sonke ukuthi sizokuthathela izinyathelo konke ukwenza okungalungile okuholela ezingozini nokulahleka kwezimpilo zabantu bakithi.

Sithi izingozi emigwaqeni yethu azizenzekeli nje, kodwa zenziwa ngumuntu osuke enze okuthile okungafanele. Ngakho-ke kumele sigxile ekuqwashiseni, ukufundisa nokuqinisa umthetho ukuze siqande ukufa kwabantu bakithi.

Ngaphansi kuka-Operation Val'ingozi sizobheka ukuthi ngeke yini aphucwe ilaysensi umshayeli omusha uma etholakala ukuthi wenze ingozi zingakapheli izinyanga eziyisithupha ethole izincwadi zokushayela.

Lokhu sikholwa ngukuthi kungaqinisa isiko lokuhlonipha nokwazi ukuthi okusempeleni phela ilayisensi yokushayela iyigunya nje, akulona ilungelo.

Ezinye izinto esizibhekayo zihlanganisa ukuvezwa kwe-video ezikhungweni zamalayisensi lapho umuntu ezokuthi esahleli mhlambe elinde umphumela we-learners abe ebuka izinto eziyingozi okumele azazi futhi azigweme uma eseshayela.

Kusinika ithemba-ke futhi ukubona ukuthi amacala amaningi ambandakanya abashayeli lapha esifundazweni ngisho nasezweni lonke, asethathwa njengawokubulala esikhundleni sokuba ngawokubulala ngokungenhloso uma kubonakala ukuthi umshayeli othintekayo ube nobudedengu.

Sithi kumele silubone ushintsho manje. Sibeka ithemba lethu ezinhlelweni ezifana nawo u-Operation Val'ingozi ukuthi uvule amehlo abantu bakithi, bese kuncika nakunina ngamunye ukuthi bathini onembeza benu.

NjengoHulumeni, asikwazi ukuhlala singenzi lutho abantu bebe benza umathanda emigwaqeni. Uma abantu bengafuni ukubambisana nathi beqhubeka nokuziphatha budedengu, sithanda ukubakhumbuza ukuthi nathi umthetho uyasivumela ukuba sibhekane nabo.

Njengoba sesibekile ukuthi u-Operation Val'ingozi ubhekene nenselelo yokufa kwabantu emigwaqeni nangesandla sezigebengu, siyazi sonke ukuthi isikhathi sikaKhisimusi sihambisana nokuphathwa kakhulu kwezimali abantu bethenga, abanye behlukanisa izitokfela njalo njalo.

Yikhona-ke lokhu okwenza sikhathazeke ngoba abantu bagcina bengasaqapheli, bazibone beyizinkinsela ezingasathintwa, kanti bazogcina sebeziphatha ngendlela ebeka bona noma abanye engozini.

Nathi, njengoba kugcizelela nomsakazo woKhozi FM oluyingxenywe yalo mcimbi, sithi kuhle ukunyusa i-volume uzibheke. Ungaziphathi sengathi ngamaholide okugcina lawa, ngoba uma ungadlulanga nawo ungase uzisole kuyo yonke iminyaka ezayo osazoyiphila.

Okokugcina, sinxusa imiphakathi ukuba isebenzisane namaphoyisa ekulweni nobugebengu. Kodwa okunye okubaluleke kakhulu ngokuba avikelwe nawo amaphoyisa akithi. Masiwasindise amaphoyisa ngokuthi sikhulume uma sinolwazi ngetulo lokubulawa kwawo.

Masisebenzisane nezinhlaka zokuphepha emiphakathini njengama-Community Policing Forum (CPF), amakomiti emigwaqo nezigodi lapho sihlala khona bese siqaphela ukungazithatheli umthetho ezandleni zethu.

Ngalawo mazwi sithi siyabonga ngokuthola leli thuba, bese sinifisela amaholide amahle nonyaka omusha onezibusiso. Size sibonane sisaphila.

Siyabonga